



**GAZETI RASMI LA SERIKALI YA
MAPINDUZI YA ZANZIBAR**
(Hupigwa Chapa kwa Amri ya Serikali)

Sehemu ya CXXV Nam. 6630

1 Novemba, 2016

Bei Shs. 5,000/=

Imekubaliwa na Mkuu wa Posta kuwa ni Gazeti

YALIYOMO

Ukurasa

Mswada wa Sheria ya kufuta Sheria ya Tume ya Uchaguzi

Nam, 9 ya 1992 225

SEHEMU YA SHERIA

Tangazo la Mswada lililotangazwa hapo chini limetangazwa katika
Gazeti Rasmi hili

Tangazo la Mswada

Nam. :- Sheria ya Tume ya Uchaguzi

TANGAZO

Mswada ufuatao utawasilishwa katika Mkutano wa Baraza la Wawakilishi ulioanza tarehe 23 Novemba, 2016 kwa kusomwa kwa mara ya kwanza na unachapishwa pamoja na Madhumuni na Sababu zake kwa ajili ya kutoa taarifa kwa wananchi.

Zanzibar
1 Novemba, 2016

(DKT. ABDULHAMID Y. MZEE)
**Katibu wa Baraza la Mapinduzi na Katibu
Mkuu Kiongozi.**

MSWADA

wa

**SHERIA YA KUFUTA SHERIA YA TUME YA UCHAGUZI
NAM. 9 YA 1992 NA KUTUNGA SHERIA YA KUENZISHA AFISI
YA TUME YA UCHAGUZI YA ZANZIBAR,
MAJUKUMU, UWEZO NA MAMBO MENGINE
YANAYOHUSIANA NA HAYO**

UMETUNGWA na Baraza la Wawakilishi la Zanzibar.

Matangazo yaliyohusu maiti, kuvunjika kwa Ushirika na baadhi ya matangazo ambayo ni muhimu kwa watu kujua yanaweza kutiwa katika Gazeti. Nakala matangazo namna hiyo, zipelekwe kwa Mhariri wa Gazeti Rasmi la Serikali ya Mapinduzi ya Zanzibar - Tanzania katika nyumba ya kupiga Chapa, Sanduku la Posta 261. Nakala zisichelewe kuliko Jumatatu kila wiki.

SURA YA KWANZA

MASHARTI YA UTANGULIZI

Jina fupi
na kuanza
kutumika

1. Sheria hii itajulikana kama Sheria ya Kuanzisha Afisi ya Tume ya Uchaguzi ya Zanzibar ya mwaka 2016, na itaanza kutumika mara baada ya kutiwa saini na Rais.

Ufafanuzi

2. Katika Sheria hii, isipokuwa kama itaelezwa vyenginevyo-

“Mgombea” maana yake ni mtu aliyeteuliwa na Tume kugombea nafasi ya Urais wa Zanzibar au Ujumbe wa Baraza la Wawakilishi au Udiwani;

“Tume” maana yake ni Tume ya Uchaguzi ya Zanzibar iliyoanzishwa kwa mujibu wa masharti ya Katiba kifungu cha 119(1);

“Katiba” maana yake ni Katiba ya Zanzibar ya 1984;

“Mwenyekiti” maana yake ni Mwenyekiti wa Tume aliyeteuliwa kwa mujibu wa masharti ya Katiba kifungu cha 119(1)(a);

“Jimbo” maana yake ni kuhusiana na uchaguzi wowote isipokuwa wa Rais, ni jimbo kwa madhumuni ya uchaguzi wa Baraza la Wawakilishi au Serikali za Mitaa na kwa uchaguzi wa Rais ni Zanzibar yote;

“Mkurugenzi” maana yake ni Mkurugenzi wa Uchaguzi aliyeteuliwa kwa mujibu wa kifungu cha 13 cha Sheria hii;

“Afisa wa Uchaguzi wa Wilaya” maana yake ni Afisa aliyeteuliwa kufanya kazi za Uchaguzi kwa mujibu wa Sheria hii na inajumuisha Afisa Msaidizi wa Uchaguzi;

“Uchaguzi” maana yake ni:-

“Mjumbe” maana yake ni mtu aliyeteuliwa kwa mujibu wa masharti ya Katiba kifungu cha 119(1);

“Waziri” maana yake ni Waziri mwenye dhamana ya masuala ya Uchaguzi.

“Mkuu wa Kurugenzi” maana yake ni mtu aliyeteuliwa na Tume kusimamia majukumu ya kitengo ikijumuisha Msaidizi wake;

“Kurugenzi” maana yake ni kurugenzi za Tume kama inavyoainishwa katika kifungu cha 17 (1) cha Sheria hii;

“Afisi” maana yake ni Afisi ya Tume iliyoanzishwa kwa mujibu wa kifungu cha 11 cha Sheria hii;

“Chama” maana yake ni Chama cha Siasa kilichosajiliwa kwa mujibu wa Sheria ya Vyama Vya Siasa, ya Jamuhuri ya Mungano wa Tanzania;

“Rais” maana yake ni Rais wa Zanzibar na Mwenyekiti wa Baraza la Mapinduzi;

“Kura ya maoni” maana yake ni utaratibu wa kupeleka suala au hoja kwa wapiga kura ili watoe uamuzi;

“Sekretarieti” maana yake ni Sekretarieti ya Tume iliyoanzishwa kwa mujibu wa kifungu cha 18 cha Sheria hii;

- (a) uchaguzi wa Rais wa Zanzibar; au
- (b) uchaguzi wa Mjumbe wa Baraza la Wawakilishi; au
- (c) uchaguzi wa Diwani;
- (d) Uchaguzi mdogo au
- (e) Uchaguzi wa marejeo.

SURA YA PILI

KUANZISHWA, MAJUKUMU NA UWEZO WA TUME

3. Masharti kuhusiana na kuanzishwa na muundo wa Tume yatakuwa kama yalivyoainishwa katika Katiba.

Kuanzishwa
kwa
Muundo wa
Tume

4.-(1) Tume itakuwa na majukumu yafuatayo:-

Kazi za
Tume

- (a) kusimamia na kuendesha mwenendo mzima wa uchaguzi na kura ya maoni.
- (b) kusimamia, kukuza na kuratibu elimu ya wapiga kura;
- (c) kuandaa, kutayarisha, na kuhifadhi na kuendeleza Daftari la Kudumu la Wapiga Kura;
- (d) kufanya mapitio na kuweka mipaka ya majimbo.
- (e) kufanya na kusimamia kazi nyengine yoyote iliyopewa chini ya masharti ya Sheria hii au Sheria nyengine au Kanuni.

(2) Kwa kuzingatia masharti ya kifungu kidogo cha (1) cha kifungu hiki, Tume itatekeleza majukumu yake kwa kufuata Katiba, Sheria na misingi ya demokrasia na utawala bora.

5. Tume, kwa mujibu wa masharti ya Katiba na Sheria zinazohusiana na uchaguzi, na kwa madhumuni ya kutekeleza majukumu yake itakuwa na uwezo wa kusimamia kampeni za uchaguzi.

Uwezo
wa Tume
kusimamia
mikutano
ya
kampeni

6.-(1) Kwa mujibu wa masharti ya Sheria hii au Sheria nyengine yoyote inayohusiana na masuala ya Usalama wa Taifa, Tume, inaweza kwa maandishi kuomba, kutoka kwa mtu au taasisi yoyote taarifa yoyote ambayo inaamini mtu au Taasisi hiyo inazo taarifa hizo.

Uwezo
wa kutaka
habari

(2) Mtu yeyote, bila ya sababu ya msingi akishindwa kutoa taarifa kwa tume kama ilivyoyelekezwa chini ya kifungu cha (1), au ametoa taarifa yoyote ambayo anajua kuwa ni ya uongo au amechelewesha kutoa taarifa

hizo ndani ya muda aliotakiwa ametenda kosa na akipatikana na hatia atalipa faini isiyopungua Shilingi laki tano na isiyozidi Shilingi Milioni moja, au kifungo kisichopungua miezi mitatu na kisichozidi mwaka mmoja au faini na kifungo kwa pamoja.

Uwezo wa Tume kutumia jengo au eneo 7.-(1) Wakati wa kipindi cha uchaguzi au kura ya maoni, Tume baada ya kushauriana na wamiliki wa jengo au eneo, itakuwa na uwezo wa kutumia jengo au eneo kwa kazi za uchaguzi au kura ya maoni.

(2) Bila ya kuathiri masharti ya kifungu (1) cha kifungu hiki, Tume haitatumia jengo au eneo lolote la ibada au eneo la chama kwa kazi za uchaguzi au kura ya maoni.

Uwezo wa kuanzisha kamati za ushauri 8.-(1) Tume inaweza, kwa madhumuni ya utekelezaji mzuri wa majukumu yake chini ya Sheria hii, kuanzisha Kamati za ushauri kama itakavyoona inafaa.

(2) katika kuanzisha kamati za ushauri, Tume itateuwa wajumbe kwa idadi na utaratibu maalumu kama itakavyoona inafaa.

(3) Kwa mujibu wa miongozo ya jumla au mahsus, Tume itaratibu taratibu za mikutano ya kamati kama itakavyoainishwa kwenye Kanuni iliyotungwa chini ya Sheria hii.

Uwezo wa kuruhusu waangalizi 9.-(1) Tume inaweza, katika uchaguzi wowote au kura ya maoni, kwa maombi maalum, na baada ya kuridhika na sifa za muombaji, kutoa kibali cha uangalizi wa uchaguzi au kura ya maoni.

(2) Tume itatoa miongozo na masharti kwa taasisi iliyopewa kibali cha uangalizi, itakayoainisha madhumuni ya kibali na hatua zinazoweza kuchukuliwa kwa taasisi itakayokiuka madhumuni na masharti ya kibali hicho.

(3) Taasisi yoyote itakayopewa kibali cha uangalizi chini ya kifungu hiki, itatakiwa kuwasilisha kwa Tume ripoti ya Uangalizi inayooelezea namna uchaguzi au kura ya maoni ulivyoendeshwa na mapendekezo yake ndani ya siku tisini (90) baada ya kutangazwa matokeo.

(4) Taasisi yoyote ya uangalizi itakayoshindwa kuwasilisha ripoti ya uangalizi katika kipindi kilichoelezwa katika kijifungu cha (3) cha kifungu hiki haitopatiwa kibali cha uangalizi katika uchaguzi au kura ya maoni zinazofuatia.

(5) Mtu yeyote au taasisi yoyote itakayofanya uangalizi wa uchaguzi bila ya kibali cha Tume itakuwa imetenda kosa na akipatikana na hatia itawajibika kulipa faini isiyopungua Shilingi milioni tatu na isiyozidi milioni tano.

Uwezo wa kutunga kanuni na miongozo 10. Tume inaweza wakati wowote mazingira yatakapohitaji, katika utekelezaji wa majukumu yake, kuandaa Kanuni au Miongozo.

SURA YA TATU
UANZISHAJI WA AFISI NA KAZI ZAKE

11.-(1) Kutakuwa na Afisi itakayojulikana kuwa Afisi ya Tume ya Uchaguzi ya Zanzibar. Kuanzish-
wa kwa
Afisi.

(2) Afisi itakuwa taasisi inayojitegemea, endelevu yenye muhuri wake na jina kila itakuwa na uwezo wa:-

- (a) kushitaki na au kushitakiwa;
- (b) kumiliki na kuhaulisha mali inayohamishika na isiyohamishika;
- (c) kuingia katika mikataba au kifungu miamala yoyote mengine ya kimkataba;
- (d) kufanya au kusababisha kufanywa jambo jengine lolote ambalo taasisi yenye kujitegemea inafanya au kusababisha kufanywa.

12.-(1) Kutakuwa na muhuri na nembo ya Afisi kwa muundo na namna ambayo itaamuliwa na Tume. Muhuri na
nembo ya
Ofisi

(2) Matumizi ya muhuri wa Tume katika kila nyaraka yatatambulika ni sahihi ikiwa yametiwa saina na Mkurugenzi au Afisa yeyote aliyeidhinishwa na Mkurugenzi.

(3) Nyaraka yoyote ambayo imetolewa na Tume ambayo imetiwa muhuri wa Tume kwa mujibu wa kifungu kidogo cha (2) cha kifungu hiki, itachukuliwa kwamba ni sahihi na ni nyaraka ya Tume ambayo itachukuliwa ni ushahidi ambao hauhitaji ushahidi mwengine.

13.-(1) Kutakuwa na Mkurugenzi wa Tume ambaye atateuliwa na Rais kwa utaratibu na masharti ambayo yataainishwa kwenye Hati ya uteuzi wake. Mkuru-
genzi

(2) Mkurugenzi, atakula kiapo cha utii na kutunza siri mbele ya Rais kabla ya kuanza kutekeleza majukumu yake.

(3) Mkurugenzi atakuwa ndiye mtendaji mkuu wa Afisi na atatekeleza majukumu ya kila siku ya Afisi.

14. Mtu atakuwa na sifa za kuteuliwa kuwa Mkurugenzi iwapo :-

- (a) ni Mzanzibari;
- (b) ana angalau shahada ya kwanza ya Chuo Kikuu kinachotambulika;
- (c) ni Afisa Muandamizi katika Utumishi wa Umma.

Sifa za
Mkurugenzi

Muda wa Utumishi wa Mkurugenzi. **15.**-(1) Mkurugenzi atashika wadhifa wa ukurugenzi kwa mujibu wa masharti ya sheria ya Utumishi wa Umma.

(2) Utaratibu wa kumuaichisha kazi Mkurugenzi utatekelezwa kwa mujibu wa masharti ya kifungu cha (119)(6) cha Katiba.

Kazi za Mkurugenzi **16.**-(1) Bila kuathiri kazi za Tume zilizoainishwa kwenye kifungu kidogo cha (4) cha Sheria hii, Mkurugenzi atatekeleza kazi zifuatazo:-

- (a) Kusimamia na kutekeleza kazi za kila siku za Afisi;
- (b) kuandaa na kuratibu Mikutano ya Tume;
- (c) kutoa ushauri wa kitaalamu kwa Tume katika kutekeleza majukumu yake;
- (d) kuandaa bajeti na kalenda ya shughuli za Tume;
- (e) kuweka kumbukumbu maamuzi ya Tume;
- (f) kutayarisha nyaraka za kazi za Tume;
- (g) kushirikiana na taasisi za ndani na nje ya nchi ambazo zinafanya kazi za uchaguzi, demokrasia na utawala bora;
- (h) kutoa na kusimamia miongozo kwa maafisa wa uchaguzi katika kutekeleza majukumu yao kama itakavyoagizwa na Tume;
- (i) kusimamia nidhamu za watendaji wa Afisi; na
- (j) kufanya kazi nyengine yoyote kama atakavyoagizwa na Tume kwa mujibu wa Sheria.

(2) Katika kutekeleza majukumu yake chini ya kifungu kidogo cha (1) cha kifungu hiki, Mkurugenzi atasaidiwa na watendaji wengine wa Sekretarieti.

Kurugenzi **17.**-(1) Tume, kwa kuzingatia masharti ya Sheria ya Utumishi Umma, itaanzisha kurugenzi za Afisi kama itakavyoona inafaa kwa ajili ya utekelezaji bora wa kazi zake.

(2) Kila kurugenzi itakuwa na Mkuu ambaye atayeteuliwa na Tume miongoni mwa watendaji waandamizi watakaopendekezwa na Mkurugenzi.

(3) Mkuu wa kurugenzi atatekeleza majukumu yake kwa mujibu wa maelekezo ya Mkurugenzi.

Sekretarieti **18.**-(1) Kutakuwa na Sekretarieti ya Tume ambayo itakuwa na jukumu la kuisaidia Tume katika utekelezaji wa majukumu yake.

(2) Sekretarieti itaundwa na wajumbe wafuatao-

- (a) Mkurugenzi ambaye atakuwa ni kiongozi wa Sekretarieti;
- (b) Wakuu wa Kurugenzi; na
- (c) Maafisa wengine kama itakavyoelekezwa na Tume.

(3) Sekretarieti inaweza kumualika mtu yeyote kuhudhuria vikao vyake kwa ajili ya madhumuni ya kutoa maoni yake ya kitaalamu.

19.-(1) Kutakuwa na Afisi ya Uchaguzi ya Wilaya kwa kila Wilaya itayosimamiwa na Afisa wa Uchaguzi wa Wilaya.

Kuanzish-
wa Afisi
za Uch-
aguzi za
Wilaya.

(2) Afisa wa Uchaguzi wa Wilaya ataajiriwa na Tume kwa mujibu wa masharti ya Sheria ya Utumishi wa Umma.

(3) Afisa wa Uchaguzi wa Wilaya kabla hajaanza kazi zake atalazimika kula kiapo cha utendaji kazi mbele ya Hakimu kwa namna kitakavyoelezwa na Tume.

20.-Afisa Uchaguzi wa Wilaya atakuwa na kazi zifuatazo:-

Kazi za
Afisa
Uchaguzi
wa Wilaya.

- (a) kusajili wapiga kura;
- (b) kuhamisha taarifa za mpiga kura kutoka sehemu moja na kuzipeleka sehemu nyengine;
- (c) kurekebisha makosa ya taarifa za mpiga kura kwenye daftari la Wapiga kura;
- (d) kuandaa kampeni za uelewa wa maswali ya uchaguzi na elimu kwa mpiga kura;
- (e) kuteuwa wagombea wa nafasi ya ujumbe wa Baraza la Wawakilishi na ujumbe wa nafasi za Serikali za Mitaa;
- (f) kusimamia shughuli za uchaguzi na kura za maoni na
- (g) kutekeleza jambo lolote kama litakavyoamuliwa na Tume au masharti ya Sheria hii au Sheria nyengine yoyote.

21.- Tume inaweza kuajiri watumishi wengine wa Afisi kwa kadiri atakavyoona inafaa kulingana na mahitaji na kwa mujibu wa masharti ya Sheria ya Utumishi wa Umma.

Watumishi
wengine

22. Kwa ajili ya kuhakikisha uhuru wa Tume na uwazi wa Afisi, Afisa isipokuwa yule aliyeteuliwa na Rais, hatohamishwa bila ya ridhaa ya Tume

Uhamisho
wa wafan-
yakazi wa
Tume

**SEHEMU YA NNE
MASHARTI YA FEDHA**

Bajeti **23.** Afisi itakuwa na bajeti yake maalumu kwa fedha ambayo zitaidhinishwa au kutengwa kwa ajili ya matumizi ya Afisi.

Fedha za Tume **24.**-(1) Kutakuwa na fedha za Tume ambazo zitajumuisha:-

- (a) fedha zilizoidhinishwa na Baraza la Wawakilishi; na
- (b) fedha zitakazopewa Tume kwa njia ya msaada, michango au aina nyengine yoyote.

(2) Mkurugenzi anaweza, baada ya kuidhinishwa na Waziri wa fedha, kuandaa utaratibu wa kuchangia mfuko zaidi.

Afisa Muhasibi **25.** Mkurugenzi atakuwa Afisa Muhasibu wa Afisi

Hesabu na Ukaguzi **26.**-(1) Mkurugenzi atatunza vitabu vya hesabu na stakabadhi zote na matumizi yote ya Afisi kwa mujibu wa masharti ya Sheria ya fedha za Umma.

(2) Akaunti za Afisi zitakaguliwa na Mdhibiti na Mkaguzi Mkuu Mkuu wa Hesabu za Serikali au Mkaguzi yeyote aliyeidhinishwa na Mdhibiti na Mkaguzi Mkuu wa Hesabu za Serikali na taarifa za ukaguzi huo pamoja na taarifa za fedha kwa Waziri.

MASHARTI MENGINEYO

Ripoti **27.**-(1) Tume, mara baada ya uchaguzi mkuu au kura ya maoni, itatayarisha ripoti inayohusiana na uchaguzi au kura ya maoni na kuiwasilisha kwa Rais.

(2) Kwa mujibu wa kifungu kidogo cha (1) cha kifungu hiki, ripoti itakuwa na mambo yote muhimu ya Uchaguzi mkuu au kura ya Maoni kwa kadiri inavyowezekana, na taarifa nyengine zozote ambazo Tume inaona inafaa.

(3) Bila ya kujali masharti ya kifungu kidogo cha (2) cha kifungu hiki, Tume kila baada ya miaka mitano itatayarisha ripoti ya utekelezaji wa kazi zake na kuiwasilisha kwa Rais.

Fidia ya ajali **28.** Bila ya kuathiri masharti ya Sheria hii, mjumbe wa Tume na watendaji wengine watakaopata ajali au kujeruhiwa wakati wakitekeleza kazi za Uchaguzi au kura ya maoni watakuwa na haki ya kupata fidia kutokana na ajali hiyo kama itakavyopendekezwa na Tume.

Makosa na adhabu **29.**-(1) Mtu yeyote ambaye-

- (a) kwa makusudi atamzuia mjumbe wa Tume au Mkurugenzi au Afisa mwingine wa Tume kutekeleza majukumu yake; au

- (b) kwa makusudi ataharibu mwenendo wa mkutano wa Tume au kufanya vitendo vitavyopelekea mkutano wa Tume usiendelee; au,
- (c) atafanya jambo jengine lolote litalosababisha Tume kushindwa kutekeleza majukumu yake;

atakuwa ametenda kosa na akipatikana na hatia atalipa faini isiyopungua Shilingi Laki Tano na isiyozidi Shilingi Millioni Moja au kifungo kisichopungua miezi sita na kisichozidi miezi kumi na mbili au adhabu zote mbili kwa pamoja.

30. Kitendo chochote kilichofanywa au kimeacha kufanywa kwa nia njema na Afisa wa Tume katika utekelezaji wa kazi au uwezo wake chini ya Sheria hii au Sheria nyengine yoyote hatokuwa na hatia ya madai au jinai kuhusiana na tendo hilo.

Kinga
kwa
maafisa
wa Tume

31. Mtu yeyote ambaye kwa makusudi atatoa taarifa yoyote ya Afisi kwa mtu yeyote asiyehusika atakuwa ametenda kosa na akipatikana na hatia atalazimika kulipa faini isiyopungua Shilingi laki tano na isiyozidi Shilingi Millioni Moja au atatumikia kifungo cha mwezi mmoja au adhabu zote mbili kwa pamoja.

Kutoa
taarifa za
Afisi

32.– (1) Malipo ya Wajumbe wa Tume yatalipwa kutoka Mfuko Mkuu wa Hazina kwa kiwango ambacho kitaamuliwa na Rais.

Malipo ya
Wajumbe
na Maafisa
wa Tume.

(2) Bila kujali kifungu kidogo cha (1) cha kifungu hiki, Afisa wa Tume atalipwa mshahara kama itakavyoamuliwa na Tume kwa mujibu wa masharti ya Sheria ya Fedha za Umma.

33.–(1) Tume inaweza kutunga Kanuni kwa ajili ya utekelezaji bora wa Sheria hii.

Kanuni

(2) Kanuni yoyote itakayotungwa chini ya Sheria hii itatangazwa katika Gazeti Rasmi la Serikali

34.–(1) Sheria ya Tume ya Uchaguzi, Namba 9 ya 1992 inafutwa.

Kufuta na
Kubakiza

(2) Bila ya kujali Sheria iliyofutwa chini ya kifungu kidogo cha (1) cha kifungu hiki, jambo lolote lililofanywa, au tendo lililofanywa chini ya Sheria iliyofutwa, litachukuliwa kuwa limefanywa chini ya masharti ya Sheria hii.

MADHUMUNI NA SABABU

Madhumuni na sababu ya kuanzishwa Mswada huu ni kufuta Sheria ya Tume, Nam. 9 ya 1992 na kuanzisha Mswada wa Sheria ya kuanzisha Afisi ya Tume na mambo mengine yanayohusiana na hayo.

Mswada huu unaopendekezwa umekusudia kuimarisha utendaji na ufanisi wa Tume ya uchaguzi kwa ajili ya kuhakikisha muundo na majukumu ya Afisi inayopendekezwa yanatambulikana yanatekelezwa na kutambulikana ipasavyo,

Tume ya uchaguzi ya Zanzibar itatekeleza majukumu yake chini ya usimamizi wa Mkurugenzi ambaye yeye ndiye atakayekuwa na dhamana ya kutekeleza majukumu na kazi za kila siku za Tume.

Vilevile, Mswada unaopendekezwa unakusudia kuanzisha kurugenzi ambazo kila kurugenzi itawajibika kwa Tume, pia katika mswada huu imependekezwa kuanzishwa Sekretariati.

Pia, Mswada unaopendekezwa umeanzisha Afisi za Tume za Uchaguzi za wilaya ambazo zitakuwa kwa kila Wilaya, lengo la Afisi hizi ni kuhakikisha kwamba uchaguzi na kura ya maoni zinaendeshwa katika misingi ya demokrasia na utawala bora.

Mswada umegawika sehemu kuu sita, na kila sehemu imebeba dhana inayojitegemea ili kuhakikisha msomaji wa Mswada huu anafahamu vizuri dhamira ya maudhui yaliyokusudiwa.

Sehemu ya kwanza imeelezea utangulizi ambao umejumuisha jina fupi na kuanza kutumika, ufafanuzi wa baadhi ya maneno ambayo yametumika katika Mswada huu.

Sehemu ya pili imeelezea uanzishwaji wa Tume, kazi na uwezo wake pamoja na kuelezea uwezo tofauti uliopewa Tume kwa mujibu wa Mswada wa Sheria hii.

Sehemu ya tatu inatoa ufafanuzi juu ya kazi za Afisi ya Tume, uanzishwaji wa Afisi hiyo, muhuri na nembo yake ambao ithibati ya muhuri wa Tume katika nyaraka yoyote itaamuliwa kuwa ni sahihi baada ya kutiwa saini na Mkurugenzi

Sehemu ya nne inazungumzia masharti ya fedha ambayo yanajumuisha utaratibu wa ukaguzi wa fedha za Tume, vyanzo ya Fedha hizo na uhifadhi wa fedha hizo kwa mujibu wa Sheria ya Fedha za Umma.

Sehemu ya tano ni sehemu ya mwisho ya Mswada huu ambayo inazungumzia utaratibu wa uandaaji wa ripoti za Tume, makosa na adhabu, uwezo wa Tume wa kutunga Kanuni kwa ajili ya kuhakikisha ufanisi wa utekelezaji wa Mswada wa Sheria hii, pamoja na vifungu vinavyoelezea kufutwa kwa Sheria ya Tume Nam.9 of 1992 na kubakiza baadhi ya mambo ambayo yalifanywa chini ya utaratibu wa Sheria inayofutwa na kutambulika kama kwambwa yamefanywa chini ya utaratibu wa Mswada **wa Sheria hii**

17 Oktoba, 2016

[MOHAMED ABOUD MOHAMED]
*Waziri wa Nchi Ofisi ya Makamu wa Pili wa Rais
Zanzibar*

